

TE MARU-METIA

Ua tatara-ê-hia atu na tele parau i roto i te tahi faanahoraa âfata teata ta tâtou. I manaô-hia ai rā e rave faahou mai i tele parau, eere ia no te ravaî ôre, aore ra no te veve i te parau, ei rāvea rā no te haapāpū maitai i te tahi mau vāhi, ia ôre tâtou ia faaôhipa noa i te tahi mau taô âpī mai te taa ôre i te auraa.

E AHA TE MARU

Te auraa ta tâtou i mātau maitai, te vāhi ruru ia ia hiôhia te parau o te ahu mahana, oia hoi, i raro aê i te hoê tumu rāau. Mai te pēu rā te riro ra te rāau ei pāruru i te taata i te ahu o te mahana, e riro atoā te maru ta na e horoā mai ei haafifi i te ora o te âihere rii o te fenua e tupu i raro aê ia na. A taa noa atu ai te reira vāhi, ua ite atoā tâtou e, no te ânaâna o te mahana i maruhia ai to te rāau. E i te tahi taime, e faaite atoā mai te maru i te huru o te rāau i niā aê ia na. Mea taa maitai te reira parau no te haari, te ūru e te meia, eiaha rā no te mau huru rāau atoā.

A ūanei tâtou a hiô mai ai i te tūātira o tele auraa to te taô maru, i niā i ta tâtou tumu parau. Te vai ā ra te tahi auraa to tele taô, ta tâtou ia e hiô mai i tele nei.

E AHA TE TĀMARU

I roto i tele parau mātau-maitai-hia e tâtou, e matara mai ai te piti o te auraa o tele taô maru. E parau tele i faaôhipahia e to tâtou

mau Tupuna i muri aê i te tau i horoâhia ai e Pomare vahine te mana faatere o te fenua i roto i te rima o Farāni.

I roto i te reira faanahoraa manaô, o Farāni ia te Hau tamaru, eiaha no te mea e, o Farani tē pārahī ra i raro aê i to tâtou maru, o tâtou rā tē pārahī ra i raro aê i te maru o Farāni, oia hoi i raro aê i to na mana : na na atu ra e faatere, na na e faanaho, na na e ôpua, na na e faaoti. Te fenua i tamaruhia, ua roaa ia ia na te haapāpūraa e, e pāruru-hia o ia, e e faaorahia i to na mau fifi.

Te piti tele o te auraa o te taô : maru, oia hoi te mana.

E AHA TE MARU-METIA

E taata tele tei tuu ia na i rao aê i te hanahana e te māmarama o te Metia. Te auraa ra, ua hitihia tele taata e te Metia. Te mea faufaa rā no na, eere ia to na ata ta na e ite ra i raro i te repo fenua, te riroraa rā te reira ei faaite e, no te Metia i niā aê ia na, i paô ai to na hohoā, to na ata i niā i te fenua.

E ara tâtou, aita te Metia e ani mai nei i te rāau e tau i te hohoā o to na ata : e haari te rāau ra, e ata haari ia tē itehia ; e meia hoi ra, e ata meia atoā ia. E hape huru hape rā to tâtou ia hinaaro i te faariro i tele ata meia ei ata âpara, no te mea noa i ta tâtou hiôraa, e mea nehenehe aê, aore ra mea tura aê te ata âpara.

Te mea faufaa no tâtou, te iteraa ia e te fāriira e, eita tâtou e



riro ei māmarama e ei ata atoā. No te mea, ua hitihia tâtou e te Metia, i maru-atoā-hia ai to tâtou, e i âua-haaâti-hia ai hoi tâtou e taua māmarama no na ra. E ia faaruê hoi tâtou i te ânaâna o to na māmarama, e au ia tâtou i te rāau e tupu i roto i te pōiri e tei âua-haaâti-hia e te maru pohe.

Mai te mahana rā ia tere, ua faahaūti i te maru o te rāau, ia ite atoā tâtou e ia fāri hoi e, e faahaūti atoā te māmarama o te Metia ia tâtou e to tâtou maru i te vāhi ta na i hinaaro, e i te taime ta na i hinaaro, ia au hoi i te ôraparaa ta na i hinaaro. Aita rā ta te taata e parau ia na e to na ata, aita ta te maru-metia e

parau ia na, na te Metia e aratai i to na oraraa tei riro mai te maru e tere i niā i te fenua nei, te maru ta te māmarama o te Metia e faahaūti ra.

Mai ta tâtou i ite mai no te Hau tamaru, ia ite atoā te taata e parau ra ia na e maru-metia e, tei raro aê o na i te mana o te Metia, e to na anaê. Tele auraa no te mana e vai i roto i te taô maru, te vai atoā ra i roto i te reo Paumotu, te Maori, te Vaihī, e te vai atu ra. Te taata i parau ia na e maru-metia, te fāi atoā ra o ia i mua i te aro o te taata atoā e, hoê anaê to na aratai, hoê anaê ture ta na e haapaô ra, hoê anaê mana faatere ia na, maoti te ture e te

mana o te Metia. Ia itehia te tahi i parau ia na e maru-metia i te haapaô-pūai-raa i te ture a te taata e te tuiroora i roto i te ôhipa tiā ôre e te haavare, e te mau peu iino atoā, eere ia i te maru-metia, e haavare rā e te hoo âiā, e te hoo hoi i te nūnaa o te Metia. I haere mai hoi te Metia e haamau i te Hau o to na Metua i niā i te fenua nei, eiaha rā te hau o te taata.

E feiā hiôpoā tâtou ra, ua ite atoā ia tâtou e, te ata o te rāau, to na maru, tei raro ia, tei niā i te repo o te fenua. Aita ā e ata rāau i itehia aê nei i niā aê i te tumu rāau. Te auraa : te huru mau e au i te maru-metia, te tāpaô hoi e itehia ai te mau taata i

hitihia e te māmarama o te Metia, o te haê-haa ia o te âau. Tei hinaaro rā i te tuu i to na ata i niā aê i te rāau, oia hoi i niā aê ia na, eere ia no te Metia, ūtātā noa ai to na vaha i te parau o te Metia.

MARU-METIA AORE RA TERETTIANO

I roto i te tahi mau himene tahito ta tâtou, te vai ra tele faahitira no letu Tra. Tele Tra, no roto mai ia i te reo Peretāne. Ia parāuhia hoi e, Tra i tele mahana, aita ia e taata e taa faahou.

Te parau nei tâtou i tele nei e, Terettiano. Tahi atoā tele parauraa no roto mai i te reo Peretāne. Ia anihia rā tâtou e tatara, aita ia ta tâtou e iōa piri i niā i tele, e te rave nei tâtou i te tahi atu parauraa e faaôhipa-noa-hia nei, oia hoi : Metia.

Mea hau aê no tâtou ia tāpeā noa hoê anaê huru parauraa. Te mea hau roa atu, te vai ra te tatararaa o tele taô, e e māmarama te tātoāraa i to na auraa nā roto i to na ihoā ferurira taata māōhi. Eere ānei e, aita te Metia e ani mai nei ia tâtou e faahuru ê, aore ra e huna i to tâtou māōhira, e vai iho rā na na e aratai i taua māōhira no tâtou ra i te vāhi ta na i hinaaro.

Ia ite tâtou i te auraa o tele parau, te riro mai ra ia tâtou ei maru-metia atoā.

TIRĀ RĀ PARAU TURO A RAAPOTO

RURURAA A TE MAU FAATERE-RURURAA

Moorea - feppure 1992

I te mau matahiti atoā, te te fārerei nei te mau faatere rururaa. I tele matahiti, ua tupu te reira i Moorea. E tiā ia haamuruuru-maitai-hia te mau taata atoā i tauturu mai i te tere-maitai-raa o te mau ôhipa. E haamuruururaa i te mau pārōita atoā o te tuhaa no ta rātou fāriira poupou.

E aha tele mau ôpuaraa e no te aha tele faanahoraa.

No tele matahiti, te ôhipa rahi tei manaôhia e rave, te hiôraa ia i te mau ôpuaraa i feruriria i roto i te rururaa i tupu na i Taunua i te âvaê Atopa matahiti 1990, tāpirihia mai ai i te reira te mau faanavaira no niā i te tōroā Faatere rururaa.

Nā mua roa, ua riro te mau rururaa ei tuhaa rahi i tele nei i roto i te mau tāpura ôhipa e faanahohia ra e nā tāātira e haapaô nei i te feiā âpī (oia hoi te Haapira Tāpati e te Ui-Âpī). E tiā ia parau, e ua tae tâtou i tele nei i te fāito e 40 rururaa i te

matahiti. E haere atu ā tele faito i niā. Tae roa mai i tele mahana, aita te tātoāraa o te mau tamarii no iho roto i te mau pārōita e fānaô nei i tele mau rururaa. E inaha, te rahi atoā mai ra te anira no rāpae mai. E nā hea tātou.

Ei pāhonora i tele hiaai e vai ra i roto i te feiā âpī, e hinaarohia te mau taata faaineinehia e tei pāpū i niā i tele tāpura ôhipa. I roto i te mau tuatāpaparaa, te itehia nei e, te iti atu ra te feiā e horoā nei i to rātou taime no tele tāpura ôhipa. Eiaha atoā ia moēhia ia tātou e, te tupu nei te reira i te âvaê Tiurai.

I mua i te tahi mau fifi i itehia, ua hinaaro te mau Faatere rururaa e haapāpū faahou e, te rururaa, no te tamarii ia nā mua roa. Ia tāuāhia to na parau, to na mau hiaai, ia hiôhia te mau fifi ta na e ora ra i te vāhi tei reira o ia i te faaearaa. Ia arataihia te rururaa ia au i te mau faaearaa a te ture e haapaô nei i te mau rururaa tamarii, e ia haapāpūhia te hinaaro o nā tāātira (te H.T e te U.A), ia au i ta rāua arataira no te hiroā faaroo. Eiaha rā ia

riro noa ei imira moni, e aore ra ei mau pū haaparareraa manaô no te feiā paari mai te tāuā ôre i te tiāmāraa o te tamarii. Te tiāturi nei te mau Faatere rururaa e, nā roto i nā fārereira i haamata mai i te matahiti 1990, e faanaho roa i te hoê arataira no te tātoā. E pāpaihia atu tele mau parau e ia tuuhia i roto i nā āpoora rahi, ta te U.A e tupu i te mau taime i muri nei e tae noa atu i ta te H.T i te âvaê tiunu. Te titaaraa tele ia ite tātou i te huru o te mau ôhipa e tupu nei, te mau ferurira i ravehia mai, ia au i te hinaaro o te mau tau i muri nei. Ia fārihia tele mau ôpuaraa, e tiāuhia ia te mau Faatere rururaa ia pee atu i tele arataira. E rāvea atoā te reira no te tautururaa i te tāātira ia pee e ia faatiāfaro i te mau ôhipa e ravehia ra i roto i te mau rururaa, nā reira hoi te mau Faatere rururaa no te faanahoraa i ta rātou mau ôhipa. E rohi āmūi tātou ia riro ta tātou mau tamarii ei mau taata paari no a nanahi tei arataihia i roto i te manaô êvaneria.

TAAROANUI MARAEA